

Kōrero

Pānui

Tuhituhi

Pāngarau

Tau 2

Kua waihangatia Ngā Whanaketanga Rumaki Māori kia mōhio ai tātou kei whea tō tamaiti i roto i ngā mahi ako i Te Reo Matatini me te Pāngarau.

E hāngai pū ana ngā whanaketanga ki te Marautanga o Aotearoa, ko te whakaako i ngā wāhanga ako katoa, arā – Te Reo Māori, te Pāngarau, te Pūtaiao, ngā Tikanga ā-Iwi, te Hauora, Ngā Toi, Te Reo Ingarahi me te Hangarau.

Me mātua whakarato te kura o tō tamaiti i ētahi pūrongo ā-tuhi e rua i te iti rawa ki a koe i ia tau. Mā au pūrongo koe e whakamōhio e rere pēhea ana tō tamaiti i runga anō i Ngā Whanaketanga me te Marautanga. Mā te kura hoki tana kōpaki mahi e homai, heoi ki te kore, tonoa te kaiako kia whakaatu mai i ētahi tauira o ana mahi.

Mō te pukaiti nei, kua kapohia ngā momo akoranga a tō tamaiti i tana tau tuarua i te kura – ā-kōrero, ā-panui, ā-tuhituhi, ā-pāngarau anō hoki. He kaponga noa iho ēnei e kite ai koe e pēhea ana ōna mōhiotanga, ōna āheinga hoki i roto i ēnei wāhanga ako.

Mēnā kua uru atu tō tamaiti i nā tata ake ki roto i te mātauranga rumaki ki te reo Māori, tērā pea ka paku rerekē te āhua e aromatawaihia ai – hei whakaata i tōna roa i roto i te mātauranga rumaki. Kōrero ki tō kaiako mēnā he āwangawanga ōu – māna e whakamārama ki a koe kei te pēhea te haere o āna mahi ako.





Kōrero

I te tau tuarua i te kura, ko te reo kōrero o tō tamaiti kei te taumata 1 o te marautanga.

E taea ana e tō tamaiti te whakaraupapa i ana kōrero, te kuhu atu i te maha ake o ngā taipitopito kōrero, me te whakaatu anō i tāna ake titiro.

E ako ana tō tamaiti ki te:

- āta kōrero e pā ana ki ana kare ā-roto me ana wheako
- tautohu i ngā ariā matua i ngā kōrero a ētahi atu
- tautohu i ngā pārongo whāiti i ngā kōrero a ētahi atu – “Āpōpō e haere ana tātou ki te kaukau, nā reira, kia maumahara ki te kawē mai i ō kākahu kaukau me tō taora.”
- taki pepeha, karakia, waiata hoki
- whakahua tika i ngā kupu
- pātai kia mārama ake ai ngā kōrero a ētahi atu
- kōrero kia mārama ai te kaiwhakarongo ki ana ariā matua.



He tauira o ngā mahi kōrero, mahi whakarongo

- Ko te kōrero e pā ana ki tētahi pikitia kua homai e te kaiako.
- Ko te mahi takirua – mā tō tamaiti tētahi pikitia e whakaahua, mā tana hoa aua kōrero e whai haere, ka tuhi ai i taua pikitia. Ka mutu, ka whakatauritea e rāua ngā pikitia e rua me te matapaki anō hoki.

I te kāinga

- Me waiata tahi kōrua ko tō tamaiti (he pai hoki kia ako koe i ētahi o ngā waiata o te kura) – “Me waiata tāua, nē?”, “Te reka hoki o tō reo waiata!”, “Me he korokoro tūi koe!”
- Tonoa tō tamaiti māna te kai e whakarite – “Māu te kai e whakarite, nē?”, “Me karakia tātou.”
- Pātai atu ki tō tamaiti he aha ana kare ā-roto e pā ana ki ngā mea kua pānuihia, kua rangona, kua mahia rānei e ia – “He aha i pai ai te eke paihikara ki a koe?”, “Ko tēhea te whakaaturanga pai rawa ki a koe?”, “He aha ai?”

Pānui

I te tau tuarua i te kura, ko te reo pānui o tō tamaiti kei te taumata 1 o te marautanga. E pānui ana ia i ngā pukapuka o te Kete Kiekie.

E pānui ana ia i ngā kōrero paki me ngā kōrero pono. Ka tautohu, ka matapaki hoki ia i ngā ariā matua mai i ngā mea kua pānuitia. Kua tīmata ia ki te pānui takitahi, hei painga mōna ake, hei rapu pārongo hoki.

E ako ana tō tamaiti ki te:

- tautohu me te matapaki i ngā kupu matua, ngā akoranga matua me ngā kiripuaki matua
- tautohu i te pūtake matua i tuhia ai te kōrero – arā, hei taki pea i tētahi mahi, hei tohutohu, hei whakaahua i tētahi tangata, mea rānei, hei kōrero paki rānei
- whakawehe i ngā kupu roa ki ōna anō kūoro – karaka = ka-ra-ka
- tautohu i te pū matua i te tīmatanga o ngā rerenga, me ētahi atu wāhi – ngā ingoa, ngā rā o te wiki, ngā marama o te tau, ngā wāhi
- whakamahi i ngā pikitia, te uhi o te pukapuka, te ingoa/ taitara hoki hei matapae i tōna kaupapa.

Kua wehewehe ngā pukapuka ki roto ‘Kete’. Tīmata ana ki te Kete Harakeke – he māmā, he poto te tuhinga. Ka piki ake ki te Kete Kiekie (i te tau tuarua i te kura), ka piki anō ki te Kete Pīngao, ā, ki te Kete Miro rā anō. Kei ia pikinga ka uaua ake, ka matatini ake te tuhinga. I tana tau tuatoru i te kura ko te tikanga e pānui ana tō tamaiti i ngā pukapuka matatini ake o te Kete Kiekie.



Ko ētahi āhuatanga o te pukapuka Kiekie i tēnei reanga

- He maha ngā kupu he auau te kite.
- He pikitia e āta tautoko ana i te tuhinga.
- Ko te āhua o te whakatakoto o ngā rerenga e āhua ōrite ana, e tāruaruatia ana.
- E rua, e toru rānei ngā rerenga ki ia whārangi.
- He māmā te tāhuhu o te paki, kua waia rānei te kaipānui ki te horopaki.

I tō tamaiti e pānui ana, tērā pea:

- ka kōrero ia mō te taunga mai o te kutu ki a ia
- ka kōrero ia mō ngā āhuatanga o te pukapuka e pai rawa ana ki a ia
- ka whakawehe i ngā kupu ki ōna anō kūoro, ka whakamahi rānei i tana mōhio ki ētahi atu kupu ki te pānui i ngā kupu hou kia tika.

I te kāinga

- Pārekareka ana ki tō tamaiti te whakarongo ki a koe e pānui pukapuka ana – pānuitia ngā pukapuka whai upoko me ngā tuhinga poto mō ngā kaupapa e whai pānga ana ki a ia.
- Toroa te whare pukapuka – rapua ngā pukapuka e pai ana te kaituhi, te kaupapa rānei ki tō tamaiti.
- Āwhinatia tō tamaiti ki te hono atu i ngā tuhinga ki ōna ake wheako. Me kōrero hoki i aha ia i ngā wā i tau mai ai aua āhuatanga ki a ia.
- Whakatītinahia ia ki te pānui i ngā momo tuhinga katoa – te niupepa, te moheni, ngā tohu, te imēra, te pātuhi hoki.

Tuhituhi

I te tau tuarua i te kura, ko te reo tuhituhi o tō tamaiti kei te taumata 1 o te marautanga.

I te nuinga o te wā, ka tuhituhi tonu tō tamaiti e pā ana ki ngā kaupapa nāna anō i kōwhiri. E taea ana e ia te tuhituhi kia toru rerenga, neke atu rānei mō taua kaupapa – ka whai tikanga tonu ngā kōrero, he ngāwari hoki ki te pānui.

E ako ana tō tamaiti ki te:

- tuhituhi mō ngā pūtake maha – he paki, he taki, he whakamārama, he whakaahua, he tohutohu
- whakamihi i te tangata, ki te whakaahua i te hononga whakapapa ki te tangata, ki te whenua hoki
- whakamahi i te irakati, te pūmatua, te tohu pātai me te tohu whakaoho
- whakarite, te whakatakoto, te whakapai haere me te whakatika i ana tuhinga i mua i te whakaputa kia pānuitia e ētahi atu.




I tēnei tuhinga a te tamaiti nei, kua:

- whakamahi ia i ētahi tīmatanga rerenga rerekē
- mārama ia he mea nui te tapanga whakaihihi
- tātaki tika ia i te nuinga o ngā kupu, tae noa ki ētahi e hāngai pū ana ki tana kaupapa
- taki ia i tētahi wheako whaiaro, i tētahi mahi hoki.

I te kāinga

- He pārekareka te mahi tuhituhi! Whakaritea he pene whītau, he pene rākau, he pene hinu, he pepa hoki mā tō tamaiti.
- Tuhia he reta, he kāri, he pitopito kōrero, he imēra rānei ki tō whanaunga, tō hoa me ētahi atu pērā i a Hana Koko, i te Tūrehu Niho rānei.
- Whakatītinahia tō tamaiti ki te tuhi ahakoa ki runga pepa, ki runga rorohiko rānei – hei aha rā te tika o te tuhi – ko te mea nui ko te kōrero!
- Tuhia ngā rārangi maha – ‘Ngā taonga hei hoko mai’, ‘Ngā mahi kia kore ai au e hōhā’, ‘He mahi māku i ngā hararei’.
- Tuhia ki roto rātaka – tāia he pikitia, whakapiria atu hoki he whakaahua.
- Tapahia ngā pū me ngā kupu mai i ngā niupepa me ngā moheni, ka hanga rerenga atu anō.



Pāngarau

I te tau tuarua i te kura, ko te mahi pāngarau a tō tamaiti kei te taumata 1 o te marautanga. Ko te nuinga o ngā mahi pāngarau, he aro ki te ako tau.

Ka whakaoti rapanga tūturu ia me te whakamahi i ōna māramatanga ki te tau, te taurangi, te āhuahanga, te ine me te tauanga. Ka tatau whakamua, whakamuri hoki, ā-hinengaro tonu, mai anō pea i te tau nui rawa, kāore kē e tīmata noa i te kotahi – ka whakamahi tonu pea i ngā matimati ki te whai haere i ngā tau.

E ako ana tō tamaiti ki te:

- whakaoti rapanga me ngā tau tae noa atu ki te 100
- tatau rearua, rearima, reatekau, whakamua, whakamuri hoki
- kimi i te $\frac{1}{2}$ me te $\frac{1}{4}$ o ngā āhua māmā me ngā huinga taonga
- whakarōpū i ngā mea me te whakamārama he aha tana mahi
- maka me te whakautu pātai, te whakaatu hoki i ōna kitenga
- tuku me te whai tohutohu
- ine mea mā te ringa, te waewae, te pene rākau rānei.



He tauira rapanga pāngarau

E 9 ngā pune, 12 ngā pereti purini. Me whai pune ia pereti. Kia hia anō ngā pune?

I te kāinga



He hira, he pārekareka hoki te pāngarau i roto i ngā mahi o ia rā.

Ngā tau me ngā tauira

- Āwhinatia tō tamaiti ki te kimi me te tūhono i ngā tau i tō kāinga, i tō takiwā rānei – ko te 7 pea, kei tā koutou pouaka reta, ko te 17 kei tā tētahi atu, ko te 27 kei tētahi atu anō.
- Kimihia ngā tauira mai i te tatau whakamua, whakamuri hoki – 5, 10, 15, 20, kātahi ko te 20, 15, 10, 5.
- Ākona i ngā meka ‘10 + ...’ – 10+4=14, 10+5=15, 10+7=17.

Ngā mahi o ia rā

- Kōrerohia ngā pikitia e mau mai ana ki ngā pukapuka – “E hia ngā manu e rere ana?”
- Kōrerohia te tunu keke – “Kia hia ngā kapu parāoa?”



Ngā mihi ki a rātou mā kua tautoko i te kaupapa nei.
Ngā mihi hoki ki te ākonga, nāna te tuhinga i te wāhanga
Tuhituhi o tēnei pukaiti.

He kōrero anō mō Ngā Whanaketanga Rumaki Māori
me Te Marautanga o Aotearoa kei te pae tukutuku o
Te Tāhuhu o te Mātauranga, www.minedu.govt.nz.

Kaitā pikitia: Ellie May Logan.

Kaihoahoa: Spencer Levine.

Ko te pukapuka i te wāhanga Pānui, ko *Te Kutu* nā Leon
rāua ko Maraea Hunia i tuhi.

I whakaputaina tēnei pukaiti i te tau 2014
mō Te Tāhuhu o te Mātauranga e Hana Limited.

Mana pupuri © Te Tāhuhu o te Mātauranga, 2014.

Nama take: 710942

